

Oqaasiliortut Ataatsimiinnerat
Sisamangorneq septembarip 11-ani 2008 nal. 10.00
Ilimmarfimmi Oqaasileriffiup ataatsimiittarfiani.

Peqataasut: Ellen J.Karlsen, Abia Abelsen, Stephen Heilmann aamma
Carl Chr. Olsen
Allatsi: Katti Frederiksen
Eva Møller Thomassen angalanissani peqqutigalugu peqataassanngilaq

Oqaluuserisassatut siunnersuutit:

1. Tikilluaqqusineq
2. Kingullermik ataatsimiinnermit imaqarniliap akuerineqarnera.
3. Nordisk årsmøde - Helsingør
4. Saaffiginnissutit suliassartallit:
 - a. Bachelor kalaallisut (31.08.08)
 - b. Siulitta sakkuisa atii (02.09.08)
 - c. Dansk nationalitetsbevis (08.09.08)
 - d. Kalaallisut "Fællesadministration" qanoq nutserneqarsiqarsinnaava?
 - e. Gruppe (=pulje) kalaallisut (09.09.08)
 - f. Sygeplejestudiet (10.09.08)
 - g. KNR-imi *Oqaatsit*-p aallakaatinneqartalernera
5. Allat


Inussiarnersumik inuulluaqqusilluta

Carl Chr. Olsen

Siulittaasoq

Katti Frederiksen

Allatsi



- 1. aamma 2. pillugit -


Siulittaasoq tikilluaqqusereermat kingullermik imaqarniliami naqqiissutissat arlaqaaluttut naqqiissutigineqarput. Siullermik Avannaamioqatigiit Killiit Avannaamioqatigiillu qanoq atorineqarnissaannut nassuiaat aaqinneqarluni, aappaattut Marketingskoordinatorip kalaallisuunngortinnerani pisortaq atorineqarsimasoq ataqatigiissaarisumik taarserneqarpoq, pingajuattut rødlistep aalajangiivigineqarnerani nassuiaammik ersarinnerusumik nassuiaatitalernissaa qinnutigineqarluni naggataagullu oqaluuserisap 3.1-ip oqaaseqaatigiittut allassimanagera paasiuminarnerusumik aaqinneqaqqulluni.

- 3. pillugu -

Avannaamioqatigiit oqaatsit pillugit Helsingørimu ukiumoortumik ataatsimiillutik naapissimanagerannit ilisimatitsissutit Oqaasiliortunut tusarliunneqarput. Netværksmødimu rapporti saqqummiunneqarpoq Fælles Nordisk søgportal, tassa Avannaamioqatigiit oqaasii atorlugit oqaatsit isumaannik ujarliut siunissami atuutilersinnaanissaanik misissuinerit saqqummiisoqarpoq. Ataatsimiinnermi ukioq manna qulequtaritinneqartoq tassaavoq *oqaatsinut isiginneriaatsit, oqaatsinik atuinerit kiisalu oqaatsinut politik*. Ataatsimiinnermi ilanngullugu saqqummiunneqarpoq Nordisk Sprogrådip 1998-imili suliaq aallarnigaa 'Moderne importord i Norden inunnit 30-nit misissuivigineqarluni suliarineqartoq, tassa Avannaamioqatigiit oqaasersianik atuisarnerat misissuiffigalugu suliap inerneru soqutiginaatillit saqqummiunneqaramik, ilaatigut makku paasineqarsimallutik: nunani avannarlerni ulluinnarni oqaasersianik atuinermi nuannarisaqannginnerusut, taakkuukkajupput oqaasersianik atuinerusut, tassa ima paasillugu oqaasersianik atuinermik nuannarisaqanngitsut sianiginngisaminnik atuikkajunnerupput, aammalu taakkunani angutit arnanut sanilliullugit oqaasersianik atueqqajaanerusut paasineqarsimalluni.

- 4.a pillugu -

Bachelor kalaallisut qanoq taaneqartassanersoq apequtigineqarmat Oqaasiliortut isumaqatigiippat akademiskiusumik ilinniakkat taaguutaat tamaasa katersoriarlugit ataatsimut suliarineqarumaartut, taamaattorli taaguutit



nunarsuarmioqatigiinni atugaareermata kalaallisuunngortinnissai pisariaqartissorineqanngilaq, soorluttaaqaq siuisinnerusukkulli taaguut cand.mag. kalaallisut qanoq taaguuteqartinneqarsinnaanera aamma apeqqutigineqarmat taaguut nunarsuarmioqatigiinni tamani atugaareermat uagut allanngortinnagu atuinnaasagipput aalajangerneqareernikuusoq.

taamaallaalli oqaatsit ullumikkut atugaasut, soorlu ilisimatoq, ilisimatusartooq, ilinniagartooq, misissuisoq il.il. sordiaaneris misissorneqariarlutik nunarsuarmioqatigiit taaguutaannut sorlernut atugaaneri ersarinnerusumik inissitsiterneqassallutik.


- 4.b pillugu -

Siulitta sakkuisa atii pillugit katersagaateqartoqarnersoq aperisoqarmat tamanna katersugaasivinnut innersuussutigineqassaaq. Maangaanniilli atuakkat pioreersut innersuussutigineqassallutik, ilaatigut makkuusut *Ethnography of the Egedesminde District with Aspect of the General Culture of West Greenland* Kaj Birket Smithimit suliaasimasoq, H.C. Petersenip qaanniornermut ilitsersuusaa *Qaanniornermut ilitsersuut*, Otto Sandgreenip atuakkiaa *Piniartorsuaq*, John Andersenip issittumi ilisimatuup atuakkiaa *Grønland – på oplevelse i kajak* aamma *Mit Grønland – opdagelsesrejser i kajak* kiisalu Meddelelse om Grønlandimi *Contributions to Polar Eskimo Ethnography*-mi Erik Holtvedip allaaserisai.

Apeqqutip eqqartorneqartup saniartigut siulitta sakkuinut tunngasut taaguutit nittartakkakkut takuneqarsinnaasunngorsinnaanissaat Oqaasiliortunit eqqartuiffigineqareerluni Oqaasiliortut aalajangerput katersugaasivimmut allagaqarniarlutik, tassani siulitta sakkuisa siunissami nittartakkakkut takuneqarsinnaasunngornissaanut suliaasaq kajumissaarutigineqassalluni.

- 4.c pillugu -

Saaffiginnissut angallatinut tunngatillugu dansk nationalitetsbevisip kalaallisut qanoq taaneqartarnera apeqqutigimmagu ima akissusiorneqarpoq: Angallatit suminggaaneeris pineqartillugit qangali taaguut atorineqartarpoq **angerlarsimaffeqarneq**. Tamannalu angallatit nunatsinni tikittartut sumit



pisuuneri aallaavigalugit immikkoortinneqartaler mata tamanna taaguut ator neqalersimavoq, taamaattumillu dansk nationalitetsbevisimik kalaallisut oqarniaraanni ima oqartoqassalluni: angallat Danmarkimi

angerlarsimaffeqartutut uppersaateqarpoq imaluunniit angallat Danmarkimi **angerlarsimaffeqarpoq**.

- 4.d pillugu -

Fællesadministration suliaqarfanni assigiinngitsuni assigiinngitsumik taaguuserneqartartoq pillugu saaffiginnittoqarmat kalaallisut taaguutissaanut siunnersuut **ataatsimut allaffeqarfik** Oqaasiliortunit tamanit tulluuttutut isigineqarluni akuersissutigineqarpoq, taamaattumillu pisortatigoortumik tamanut atuuttussiannorluni.


- 4.e pillugu -

Assammik arsaattartut anngunniullutik unammilerunik oqaatsit qallunaatut gruppe (=pulje) ator neqassapput. Taakkua kalaallisut qanoq taaguuteqartinneqassaneri apeqqutigineqarmat ordboginissaaq allaqqasup oqaasersiap **gruppi**-p ator neqaannaarrnissaa siunniunneqarpoq timersornerup iluani atugaareermat tulluutsinneqarnerummat, timersornermilu oqaluttaasartut nassuiaanerminni oqaaseq anngunniuttut atortarpaat, taamaattorli unammeqatigiiat agguarneqarsimanerunik taasiniaraangamik gruppi puulialu atortalugit.

- 4.f pillugu -

Peqqissaanermik Ilinniarfiup sygeplejestudiep kalaallisut taaguutissaa pillugu saaffiginnissutaa Oqaasiliortunit akissusiorneqareerluni maanna Peqqissaanermik Ilinniarfiup qisuariarfigaa. Oqaasiliortut siunnersuusiat Peqqissaanermik Ilisimatusarfik maanna nammineq atuisuisa ima siunnersuutigaat: Peqqissaasutut Ilisimatusarfik. Siunnersuulli Oqaasiliortut isumaannik allanngortitsinngilaq, taaguusiiniarnermimi inuit ilinniartut sunngorniarneri pineqarpallaaratik ilinniakkap suunera aallaavigalugu, tassa ilinniakkap imarisaa qitiutillugu taaguusiigamik, tamannalu saaffiginnissuteqartunut nassuiaatigineqarluni ingerlateqqinneqassaaq.

- 4.g pillugu -



KNR-imi *Oqaatsit*-p aallakaatinneqartalerneranut atatillugu oqaatsit nassuiaatitallit 17-it suli pisariaqartinneqarmata Oqaasiliortut ikiortiserineqarput oqaatsinik piukkussaqaarunik ilassuteqaqqullugit.

- Allat pillugit -

Saaffiginnissutit allat oqaatsit ataasiakkaat isumaat imarisaallu pillugit saaffiginnissutaapput, ukuusut: inuussutissarsiut/inuutissarsiut, nalunaaqutaq ataatsimut/ataatsinut, transfer pricing kalaallisut, oqalualaat aamma oqaluasaat, qimmip qungasequtaa.

Inuussutissarsiutip inuussutissaq aallaavigimmagu nagguimmigut ersereerpoq sorleq eqqortuunersoq, tassanilu immaqa nipit aninneqartartut aallaavigalugit inuit ilaanni inuutissanngorsimavoq paatsuuineramik tunngavilik.

Nalunaaqutaq ataatsimut aammalu ataatsinut immikkut assigiinngitsunut atorneqartarnersut apeqqutigineqarpoq. Naanerit –mut aamma -nut qasseersiummik allanngortitsinerinnaapput, taamaattumik oqartarpugut nalunaaqutaq ataatsimut, sumut tunnganera apeqqutaatinnagu.


Transfer pricing kalaallisut taaguusernianninnerani qanoq isumaqartillugu sumullu atorneqartillugu apeqqutigineqarnersoq paasinianeqaqqaassaaq, taamaasiornermi taaguut eqqornerusoq aatsaat pilersinnaammat.

Oqalualaat/oqaluasaat aamma oqaluttuat assigiinngissutaat pillugu apeqqutilliisoqarmat nassuiaatit:

Oqalualaartussaqaqaraluarnepoq...-mi *Oqaluttuat H.J.Rinkip katersai*-ni taaguutit oqaluttuat aamma oqalualaarutit ima immikkoortinneqarput: oqaluttuat (ullumikkut oqaluttuatoqqanik taasakkavut) tassaapput siuaasanit kingornussat ukiorpassuarni oqaluttuareqqiisarnernit ingerlateqqinneqartarsimasut.

Oqalualaarutit oqaluttuaapput nutaanerusut, taakkualu pilersimapput inooqatigiit nutaat pileriartorneranni, soorlu siullermik arfanniat, kingusinnerusukkullu kristumiussutsip pilernerani aallaaveqartut.

Knud Rasmussenip oqaluttuat oqalualaalullu ima immikkoorsinniarpai:



Oqaluttuat tassaapput oqaluttuatoqqaq qangarsuarli eskimuunit 'pigineqartut', oqalualaaullu inunnit ukiuni suli eqqaamaneqarsinnaasuni inuusimasunik imaqartut. Tamatigit inoqarfinnut aalajangersimasunut atasuupput, taamaattumillu sumiiffissarsineqarsinnaallutik.

Hans A.Lyngep Else Kleistillu ilinniartitsisunut mappersagaliaanni *Oqaluttariarsorneq*-mi allaqqavoq kalaallisut oqaluttuatoqqat immikkoorsinniarneqartarneri ajornartorsiutigisarivut, oqaluttuallu oqaluttuatoqaanersut oqalualaajunersulluunniit inissikkuminaattartut.


Halsbånd kalaallisut **qimmip qungasequtaanik** taaneqarsinnaanersoq saaffiginnissutigineqarpoq, tamannalu ippinnartoqaranilu ilaatigit atugaareermat isumaqatigineqarluni akuersaarneqaannarpoq.

Oqaasileriffiup KNR-radio aqqutigalugu aallakaatittagaanut tunngassuteqartumik Oqaasiliortut eqqaasissuteqarput Oqaasiliortut ataatsimiinnerannit saqqummiussisoqarniartillu imaqarniliat aatsaat akueriteqqaarlugit avammut saqqummiunneqartarnissaat.

W kalaallisut veersuarmik taaneqartarnissaanut atatillugu Oqaasiliortut oqaatigaat 'veersuaq' suli tamanut atuuttussianngorlugu akuerineqanngitsoq, taamaattorli imaqarniliat ilaanni akuerineqarsimasutut allaqqammat ataatsimiinnissap tullissaanut oqallisissatut siunnersuummut ilanngunneqassalluni.

Ataatsimiinnissami tullermi Oqaasiliortunit nalunaarut 2007-imeersoq eqqartugassatut pingaarnertut inissinneqassaaq. Kiisalu terminologiens terminologi ukiamut novembarip qaammataani ulluni marlussunni suliaralugu aallarteqqinnissaa aalajangiunneqarpoq, taaguusersuuserinermilu ilisimasallip Lisathep peqataatinneqarnissaa Oqaasiliortut kissaatigaat.

Inussiarnersumik inuullaqqusilluta



Oqaasileriffik

Sprogsekretariatet

Carl Chr. Olsen

Siulittaasoq

Katti Frederiksen

Allatsi

Oqaasileriffik – Sprogsekretariatet

Postboks 980, DK-3900 Nuuk, Kalaallit Nunaat, +299 362326, +299 327342 fax), e-mail: oqaasileriffik@gh.gl,
www.oqaasileriffik.gl